



BIOGRAFIJA

Ivana Hadžihasanović (rođ. Gojmerac), doktor obrazovnih nauka, baletni pedagog, koreograf i direktorica Organizacije Tanzelarija, je rođena 14. 3. 1986. godine u Sarajevu. Godine 2004. je završila Odsjek za klasični balet i Teoretsko-pedagoški odsjek u Srednjoj muzičkoj školi u Sarajevu. Diplomirala je 2008. godine na Muzičkoj akademiji - UNSA, gdje je stekla i zvanje magistra muzičkih nauka iz oblasti Metodike muzičke nastave u 2011., a doktorirala je na Pedagoškom fakultetu Univerziteta u Sarajevu 2021. godine.

Od 2006. godine Ivana Hadžihasanović je zaposlena u JU OMBŠ „Novo Sarajevo“ kao nastavnica klasičnog baleta i historijskih igara. Od 2013. godine je angažovana prvo kao viši asistent, a zatim i kao docent na Fakultetu društvenih znanosti „dr. Milenko Brkić“, Sveučilište Hercegovina. Od septembra 2015. godine, djeluje i kao direktorica Organizacije za promociju savremenog plesa „Tanzelarija“ u Sarajevu, u okviru kojeg vodi edukacijske i umjetničke projekte na nacionalnom i internacionalnom nivou.

Hadžihasanović kao savremeni plesač i koreograf freelancer je do sada učestvovala na nekoliko internacionalnih i regionalnih projekata kao što su Balkan Dance Project, Identity Move, Sarajevo Mind Map, Body without a text, Dance Plants, Balkan Dance Project,...itd. Godine 2018. je postavila svoj koreografski prvjenac „Znakovi pored puta“, kao dio plesnog triptiha zajedno sa svjetski poznatim koreografima Igorom Kirovom i Aleksandrom Ilićem.

Ivana Hadžihasanović je kreator MD terapije (integrirani oblik plesne i muzičke terapije). Autorica je edukacijskog programa Silent Dance koji je dobio priznanje za jedan od 70 najboljih edukacijskih programa u svijetu od strane Zeroo Projecta za 2020. godinu. Autorica je dvije knjige i oko desetak naučnih radova, a svoje radove redovno izlaže na naučnim konferencijama. Kao predavač gostovala je na brojnim Univerzitetima u BiH, Sloveniji i Hrvatskoj.

Hadžihasanović je bila član tima za reformu Nastavnog plana i programa za Osnovne i srednje baletske škole u Kantonu Sarajevo u 2016. godini. Učestvovala je i u kreiranju Nastavnog plana za baletske škole u Tuzlanskom Kantonu 2012. godine, te u osnivanju Odsjeka za klasični balet pri JU Osnovnoj muzičkoj školi Tuzla.